

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17), a u vezi sa članom 70. stav (8) Zakona o izvršenju Budžeta Tuzlanskog kantona za 2025. godinu („Službene novine Tuzlanskog kantona“, br. 18/24 i 7/25), Vlada Tuzlanskog kantona na sjednici održanoj dana 20.11.2025. godine, d o n o s i

O D L U K U

o utvrđivanju kriterija, uslova i postupka za raspodjelu sredstava sa potrošačke jedinice 11010022 – Mediji za 2025. godinu

Član 1.

Ovom odlukom utvrđuju se kriteriji, uslovi i postupak raspodjele sredstava sa potrošačke jedinice 11010022 – Mediji.

Član 2.

Raspodjela sredstava sa potrošačke jedinice iz člana 1. ove Odluke vršit će se u skladu sa Budžetom Tuzlanskog kantona za 2025. godinu i Zakonom o izvršenju Budžeta Tuzlanskog kantona za 2025. godinu, u ukupnom iznosu od 250.000,00 KM za medije u privatnom sektoru (privatna preduzeća i poduzetnici) i za neprofitne organizacije koje u okviru svoje djelatnosti obavljaju i poslove javnog informisanja.

Član 3.

Uslovi za dodjelu sredstava su:

- a. da su registrovani, imaju sjedište i djeluju na području Tuzlanskog kantona ili imaju stalnog dopisnika sa područja Tuzlanskog kantona,
- b. da posjeduju dozvolu za rad Regulatorne agencije za komunikacije Bosne i Hercegovine (odnosi se na radio i televizijske stanice),
- c. da raspolažu tehničkim, prostornim i kadrovskim potencijalom za pružanje medijskih usluga,
- d. da imaju izmirene zakonske obaveze po osnovu poreza i doprinosa, zaključno sa 31. decembrom 2024. godine, te da su opravdali sredstva dobivena od Vlade Tuzlanskog kantona u prethodnoj godini sa pozicije iz člana 1. ove Odluke,
- e. da se protiv podnosioca prijave, odnosno lica ovlaštenog za zastupanje, ne vodi krivični postupak i da nije pravosnažno osuđen za prekršaj i/ili počinjenje krivičnog djela,
- f. da dostavljeni programski sadržaj, sa akcentom na Tuzlanski kanton, obrađuje najmanje jednu od slijedećih aktivnosti:
 - praćenje aktivnosti i izvještavanje o aktivnostima rada Vlade Tuzlanskog kantona, premijera Tuzlanskog kantona, kantonalnih ministarstava, te javnih ustanova ili preduzeća sa većinskim učešćem Tuzlanskog kantona u vlasništvu njihovog kapitala,
 - afirmacija poduzetništva, obrtništva, umjetničkih i starih zanata,
 - razvoj i unapređenje poljoprivrede,
 - privredni razvoj, racionalno korištenje energije, racionalno korištenje prirodnih i mineralnih resursa, afirmacija korištenja obnovljivih izvora energije,
 - afirmacija društvenog, kulturnog i turističkog razvoja,
 - praćenje realizacije projekata investicijskog ulaganja Vlade Tuzlanskog kantona u oblasti obrazovanja, pravosuđa, putne infrastrukture, sigurnosti i zaštite okoline,
 - promociju sporta kod djece i mladih ili su namijenjeni djeci i mladima.

Član 4.

Kriteriji za dodjelu sredstava su:

1. kvalitet dostavljenog programskog projekt,
2. kapacitet organizacije da provede programski projekat,
3. broj predstavljenih tematskih oblasti kroz dostavljeni programski projekat,
4. doseg subjekta aplikanta - broj pratilaca osnovnog službenog profila na društvenim mrežama (facebook, instagram), broj posjeta za web portale ili slušanost/gledanost radija/televizije,
5. kvalitet i uspješnost ranije realiziranih projekata, finansiranih ili sufinansiranih od strane Vlade Tuzlanskog kantona.

Član 5.

Uz prijavni obrazac, predlagač je dužan dostaviti i:

1. Rješenje o upisu u registar pravnih lica i Rješenje o razvrstavanju djelatnosti (originali ili ovjerene kopije),
2. Ugovor o radu, rješenje ili drugi pravni akt kojim se dokazuje stalni radni angažman dopisnika na području Tuzlanskog kantona (za medije koji su registrovani van područja Tuzlanskog kantona) (ovjerena kopija),
3. PBA3 obrazac dopisnika (za medije koji nisu registrovani na području Tuzlanskog kantona) (original ili ovjerena kopija),
4. Dokaz/potvrda nadležne poreske uprave FBiH da se predmetni dopisnik nalazi na listi osoba kojima su uplaćivani porezi i doprinosi za 2025. godinu (za medije koji nisu registrovani na području Tuzlanskog kantona) (original ili ovjerena kopija),
5. Uvjerenje o poreznoj registraciji i spesimen potpisa (original ili ovjerena kopija),
6. Programski projekat (emisije ili ciklus emisija, odnosno novinskih ili internet članaka) sa kojima se aplicira na javni poziv, sa kratkim opisom sadržaja i načina realizacije i utvrđenom dinamikom i planom emitovanja – štampanja,
7. Finansijski plan predloženog programskog/ih projekta/projekata, sa specifikacijom troškova (izrada, emitovanje, objavljivanje/izdavanje) i visinom sredstava koja se potražuju od Vlade Tuzlanskog kantona,
8. Dokaze o izmirenim obavezama po osnovu poreza i doprinosa:
 - a. Uvjerenje nadležne poreske uprave ili potvrda nadležne poreske uprave o zaključenom sporazumu o plaćanju dužnih javnih prihoda u ratama (original ili ovjerena kopija)
 - b. Uvjerenje uprave za indirektno oporezivanje (original ili ovjerena kopija),
9. Dokaze o nevođenju krivičnog postupka i nekažnjavanju:
 - a. Uvjerenje o nevođenju krivičnog postupka i
 - b. Uvjerenje o nekažnjavanju za podnosioca prijave, odnosno lica ovlaštenog za zastupanje,
10. Izjavu ovlaštenog lica o organizaciji rada medija, broju zaposlenih, području koje medij pokriva, tehničkoj opremljenosti, obimu i strukturi vlastite produkcije, redovnom tiražu (odnosi se na štampane medije), gledanosti/slušanosti i posjećenosti, te broju pratilaca na društvenim mrežama, i
11. Važeća dozvola RAK-a za emitovanje (za radio i televizijske stanice) (ovjerena kopija).

Član 6.

Sredstva za medije dodjeljuju se na osnovu javnog poziva za predlaganje programskih projekata koji čini sastavni dio ove Odluke.

Javni poziv se objavljuje u dnevnim novinama i na zvaničnoj web stranici Vlade Tuzlanskog kantona.

Prijave na javni poziv za raspodjelu sredstava se dostavljaju u roku od 15 dana od dana objavljivanja u dnevnim novinama Komisiji koju formira Vlada Tuzlanskog kantona.

Komisija će izvršiti evaluaciju i vrednovanje pristiglih programskih projekata, te sačiniti rang listu programskih projekata, kao i prijedlog Programa raspodjele sredstava, te ga dostaviti Vladi Tuzlanskog kantona radi donošenja.

Član 7.

Jedan predlagač može kandidovati najviše dva programska projekta.

Sredstva iz člana 2. ove Odluke, mogu se raspoređivati na programske projekte u maksimalnom iznosu od 15.000 KM po projektu.

Član 8.

Po donošenju programa raspodjele sredstava, Vlada Tuzlanskog kantona će, na prijedlog Komisije, donijeti pojedinačne odluke o odobravanju sredstava korisnicima, kojim će se utvrditi, prava, obaveze i odgovornosti korisnika, način pravdanja dodijeljenih sredstava, te način izvještavanja.


Svaki korisnik sredstava je, za dodijeljena sredstva, dužan dostaviti izvještaj o namjenskom utrošku sredstava u roku utvrđenim odlukom o odobravanju sredstava, da realizira sve aktivnosti u okviru programskog projekta, kao i da sve tekstove, emisije, priloge, reportaže ili druge oblike medijskog izvještavanja urađene u okviru projekta promoviše i putem zvaničnih profila na društvenim mrežama.

Član 9.

Odluka stupa na snagu danom donošenja i bit će objavljena u „Službenim novinama Tuzlanskog kantona“.

BOSNA I HERCEGOVINA
Federacija Bosne i Hercegovine
TUZLANSKI KANTON
V L A D A

Broj: 02/1-11-34534/25
Tuzla, 20.11.2025. godine



PREMIJER KANTONA


Irfan Halilagić